

# Fokus lima strategi: Maszlee

Sinar Harian 22/10/2018 m/s 09

## Perkasa pembangunan modal insan di bawah RMK11

PUTRAJAYA

Kementerian Pendidikan akan memberi penekanan terhadap lima strategi bagi memperkasakan pembangunan modal insan di bawah hala tuju 2018-2020 Rancangan Malaysia Ke-11 (RMK11).

Menterinya, Dr Maszlee Malik berkata, lima strategi tersebut ialah usaha meningkatkan kualiti pendidikan, mengutamakan Pendidikan Teknikal dan Latihan Vokasional (TVET) berkualiti berbanding kuantiti, memperbaiki pendidikan untuk semua, memastikan industri berkemahiran yang berkaitan dan mempromosikan sumbangan industri.

"Kelima-lima strategi ini akan diberi fokus, susulan pembentangan Laporan Kajian Separuh Penggal RMK11 oleh Perdana Menteri, Tun Dr Mahathir Mohamad di Parlimen

pada 18 Oktober lalu," katanya dalam kenyataan di sini, semalam.

Berikutan pendidikan adalah sektor penting dalam melahirkan masyarakat holistik, Maszlee berkata, terdapat lebih 50 inisiatif yang akan dilaksanakan di bawah lima strategi tersebut sepanjang tempoh dua tahun akan datang.

Menurutnya, ia merangkumi keperluan sektor pendidikan dan pendidikan tinggi, susulan penggabungan Kementerian Pendidikan dan Kementerian Pendidikan Tinggi.

Maszlee berkata, antara inisiatif tersebut termasuklah meningkatkan kecekapan penjagaan awal kanak-kanak dengan meningkatkan pendidikan penjaga, meningkatkan kompetensi guru dan pemimpin sekolah, menggalakkan perkongsian awam-swasta dalam penyampaian pendidikan, serta mendidik dan mempersiapkan pelajar dengan kekuatan etika dan moral, kebolehan menyelesaikan masalah semasa dan cabaran depan.

Selain itu katanya, inisiatif juga melibatkan usaha memperbaiki proses pendaftaran masuk di tahun satu, menambah baik ruang pem-

belajaran kepada Bilik Darjah Pintar Pembelajaran Abad ke-21, mempertingkatkan kecekapan bahasa Inggeris mahasiswa dengan pelaksanaan Malaysia English Assessment (MEA), dan meningkatkan tahap penguasaan bahasa Inggeris di sekolah melalui inisiatif Program Dwi Bahasa.

Inisiatif lain ialah memperluaskan pendidikan untuk kanak-kanak berkeperluan khas, menaik taraf sekolah daif di kawasan luar bandar terutama di Sabah dan Sarawak, mengurangkan keciciran dalam kalangan pelajar dan mengenal pasti isu kanak-kanak tidak pernah bersekolah, meningkatkan penyertaan masyarakat dalam Kursus Pembelajaran Sepanjang Hayat, dan memperluas Sistem Latihan Dual Nasional.

"Kesemua inisiatif yang telah digariskan akan dilaksanakan dengan tersusun bagi mencapai matlamat dihasratkan kerajaan dan harapan rakyat," katanya.

Menurutnya, Ketua Setiausaha Kementerian Pendidikan, Datuk Dr Mohd Gazali Abas akan mengetuai jawatankuasa yang telah ditubuhkan untuk memantau pelaksanaan inisiatif telah digariskan. - Bernama

## LIMA STRATEGI KEMENTERIAN PENDIDIKAN

